



L. diretif dla Union Generela di Ladins dla Dolomites di ultims agn: Manuela Ladurner da Fodom (vizepresidenta), Milva Mussner (presidenta) y Fernando Brunel (vizepresident).

N »de gra« y »preibel«

L'UGLD-Union Generela di Ladins dla Dolomites s'à enduné per lité l consei y l president nuefs per i 3 agn che à da vegni: Antone Pollam de Fascia tol su l testimonone che ti vegn passé via da Milva Mussner do 7 agn de presidenza, ardiment y gran ativité per la »cossa ladina«. Antone Pollam é da 50 agn militant dles cuestions ladines, al é sté anter l auter per 20 agn president dla Union di Ladins de Fascia y per 10 agn sourastant dl Istitut Ladin »Majon di Fascegn«

— de plu a plata 3

L'Union Generela di Ladins ciala inant

Aprové l cont consuntif per l ann passé y l program d'ativité per l temp che vegn. Lites dl consei direttif dla Union Generela per i 3 agn che vegn: Antone Pollam de Fascia (classa 1952) diventa l president nuef, Mikva Mussner y Manuela Ladurner sarà bonamenter les does vizepresidentes



La ciomò presidenta Mikva Mussner à podù saludé n bel salf de jent, a sia man dreta l'aministradoura dla Union Generela di Ladins Marion Kostner, a sia man ciancia i doi vizepresidenc dla Union Generela di Ladins Manuela Ladurner y Fernando Brunel.

Milva Mussner de Selva lascia la presidenza dla Union Generela di Ladins dla Dolomites do set agn de gran impegn, de gran desfidés (ence per l Covid-19) y n program de ativité y publicistich spes y ampl. Ma Milva ne lascia perchel nia sia pascion, che è chela da organisé cultura y coezion sozuala per ductes i les Ladins:es, per tegni su y svilupé chela unité che è ciomò ti cuers dla jent y cialé da stravardé i idioms desferenc da l'assimilazion che vâ tres inant senza soné la gran ciampâna. L sonn a martel è indere da audi da cent agn encâ, da canche

la politica nazionalistica taliana à desparti l popul ladin con confins amministratîfs aldò dl proverb: divide et impera!

Cialan derevers a chest mandat de Milva Mussner èl da auzé fora dantaldut la gran enconteda dla jent ladina dl 2016 sul jout dl Sela (tla recorenza di 70 agn da la Enconteda dl 1946), canche Milva fova da n ann presidenta de chesta gran lia tet ladina che è un di leams storic y independenc dles Ladines y di Ladins (forsc la soula). La gran atenzion de Milva Mussner te chisc

set agn ti è juda tresfora al projet de La Usc di Ladins, con la profesionalizazion dles redazions tla Val Badia, te Gherdeina, te Fascia y te Souramont, y ence la tecnologizazion di laour y l layout nuef metù en at da l'aisciuda dl 2019 inant. Atualmenter à La Usc di Ladins undesc dependenc:tes y speises anuales per na soma entourn a n milion y centissessanta mile euro.

Milva Mussner à podù ti dé l benvegnù a na bela delegazion de dutes les Unions di Ladins dles valedes ladines, a de plu raprezentanc:tes di

trei istituc culturai ladins (Istitut Ladin Micurà de Rù, Majon di Fascegn y Istitut Cesa de Jan a Col) y a de plu persones interessedes a la cossa ladina.

Al è sté na senteda da conc y programs, con n uedl derevers a cie che è sté – dantaldut ence les grovaries di ultims doi agn per la pandemia – y na gran volonté y ence motivazion per programé ativités y publicazions tl temp che vegn.

Y al è sté samben l'ocazion da ti di «de gra» a Milva Mussner per i cruzes,

la gaissa y la competenca che ala à metù a luster tratant si mandat. Sce an pensa che na persona che à na familia y n laour, se dà da fé con tant na gran dedizion y tant n gran ardiment a la cossa ladina, fajan la presidenta a temp plen debant y ence tl medem temp impresara y responsabla de na dita con na doseina de dependenc:tes, spo véiden atira che demé n «de gra» ne recompenseia nia dut cant. Al è meric y ideai da vedei, senti y audi, meric che ne vâ nia da despaie ju con reconescimenc y niencie con diploms, ma che resta tl temp per si valour efetif. **IR**



Fernando Brunel à porté l salut da pert de Fascia y l rengraziament a Mikva Mussner per dut l laour fat y che ala fajarà inant.



L'aministradoura Marion Kostner y l consulent y revisour di conc Luis Stuffer à porté dant la relazion sun speises y entredes tl ann passé.




L direttour de La Usc di Ladins Iaco Rigo à conté dl laour tles redazions, y dl svilup y miorament fat chisc ultims agn.



Sabina Willeit, presidenta dla Comunita Ladina a Bulsan, à rengrazié dla colaborazion y atenzion che l'Union Generela di Ladins ti dà da plu agn encâ.




Momika Senoner è la vizepresidenta dl Istitut Ladin Micurà de Rù. Ala à reconesciù l bon laour de Mikva Mussner y dla Union Generela di Ladins.



Elsa Zardini, la presidenta dla Union di Ladins de Anpezo.



Lara Battisti, la presidenta dl Istitut Ladin Majon di Fascegn, à conté dla colaborazion anter i trei istituc culturai ladins.



Federico Corradini, l responsabel dles Scoles de Fascia.



Denni Dorigo, l direttour dl Istitut cultural a Col.